

Proyectonan di Facilidatnan Multifuncional a tene cuenta cu deseo di habitantenan di cada distrito



ORANJESTAD(AAN): Ta facil pa Gobierno yega pone un edificio den un bario, pero “bo no sa si e ta bay bon of malo, y si e ta algo cu e bario kier of no,” Omar Harms, encarga cu e proyectonan di Facilidatnan multifuncional a duna di conoce den un conferencia di prensa diamars merdia. “P’esey loke nos kier a haci ta puntra kico e hendenan di bario mes kier,” Harms a agrega referiendo na un consulta extenso cu a haci pa yega na un diseño specifico pa cada uno di e MFA-nan. Tur esaki a bini dilanti den un conferencia

di prensa, unda Gobierno a duna un splicacion amplio riba tur e Facilidatnan Multifuncional cu Aruba ta haya, con nan lo bay worde ehecuta y principalmente pakico nan lo worde uza. Omar Harms, kende tabata e persona encarga pa coordina e diferente fasenan di e proyecto di MFA, a splica cu a cuminsa traha riba realisacion di edificacionan MFA casi dos aña pasa. Mientras cu na inicio tur cos tabata muestra cu e caminda ta facil, a bin topa cu retonan cu no tabata facil haya un solucion rapido. Por ehempel si inicial-

mente a papia di amplia tur e edificacionan existente, esaki no den tur caso tabata realisabel, mientras cu unda si e tabata posibel, e rediseño a tuma mas tempo cu a spera. “Ta mas facil pa diseña un edificio completamente nobo cu rediseña uno existente y ampli’e tambe,” Prome Minister Eman a comenta den e conferencia di diamars merdia, un rato prome cu Harms a yega na palabra. “A reuni cu habitante y lidernan di e distrito pa mira ki uzo adicional por brinda den e MFA-nan y mester a trata di yega na un balans di tur e deseo y proposicionnan haci,” coordinador di e proyecto MFA a indica. Otro aspecto importante ta cu Minister di Asuntonan General Mike Eman mester a bay Parlamento pidi aprobacion pa cera un contracto di mas cu cinco añanan cu SOGA, Stichting Onroerend Goed Aruba, cu ta busca financiamiento pa e proyectonan y na final Go-

bierno lo huur e edificacionan. Mester a evalua cual tabata e miho terenonan disponibel pa e proyectonan cu mester a worde otorga na SOGA. E parti aki tambe a tuma su tempo, ya cu tabata busca un localidad cu toch tabata un poco visibel for di caminda grandi. “Tur hende mester sa unda e edificacion MFA ta keda,” Harms a bisa. Den e conferencia a bini dilanti tambe cu p.e. na e MFA San Nicolas oficina di Enseñansa pa Empleo ta bolbe y tambe lo tin un filial di DIMAS y na Paradera probablemente lo inclui un oficina di dokter di cas. Na MFA Sta. Cruz y Noord ta bini un oficina di AZV y di otro banda den tur e MFA-nan tin oficinanan di Gobierno, Oficina di Impuesto, un luga pa Bib-

lioteca y un cafetaria chikito. Anki Vrolijk, kende tin direccion di edificacionan MFA, a splica cu “e vision di Gobierno ta pa trece e hendenan den bario hunto y MFA lo ta e luga adecua.” E managernan di e diferente MFA-nan lo enfoca pa trece habitantenan hunto, organizando diferente tipo di actividad manera lesnan di baile, musica, exposicion di obranan artistico y mucho mas. Den cuadro di esaki a traha estrechamente cu arkitectonan pa crea un luga moderno, ideal y capaz pa acomoda e tipo di actividadnan aki. Y, el a agrega, e rol di e MFA-nan sigur lo no bay competi cu centronan di pero ta complementa nan. “Nos sigur lo kier traha cu nan,” el a enfatisa.